

THE INTERNATIONAL CENTRE FOR INFORMATION MANAGEMENT SYSTEMS AND SERVICES Torunj, Poljska

Nakon 1989. godine, značajne političke, ekonomske, socijalne i kulturne promjene počele su se dešavati u istočnoj i centralnoj Evropi. Ideja otvorenog društva postala je činjenica.

Broj studenata na univerzitetima u ovom dijelu Evrope se udvostručio. Osnovane su mnogobrojne privatne škole, a na obrazovanje se gleda kao na dobru investiciju. Biblioteke postaju sve važnije institucije, a biblioteke iz ovog dijela svijeta dobijaju podršku Fondacije Mellon koja obezbjeđuje značajne donacije ne samo za razvoj visokog obrazovanja nego i za modernizaciju biblioteka (komputerizacija). Osim fondacije Mellon, razvoj i modernizaciju bibliotečke djelatnosti pomažu i Regionalni bibliotečki program Instituta otvoreno društvo i Evropska komisija.

Današnji bibliotekari moraju mnogo učiti ako žele ispuniti očekivanja svojih sponzora i svojih društvenih zajednica. Promjene se stalno dešavaju pa se i bibliotekari koji se njima bave suočavaju sa istim poteškoćama. U sredini koja se brzo mijenja potrebno je da i bibliotekari i informacijski stručnjaci modernizuju i osavremenjuju svoju struku. Tehnološke promjene i novi menadžerski pristupi toliko su transformisali bibliotečku praksu da je sada praksa počela ostavljati za sobom teoriju koja se uči u bibliotečkim školama ovog regiona.

Na Univerzitetu Nicholas Copernicus osnovan je International Centre for Information Management System and Services (ICIMSS). Cilj Centra je da pomogne u rješavanju nekih od ovih problema i da bude mjesto gdje će se sticati znanja iz modernih bibliotečkih i informacionih nauka. Da bi to ostvario, Centar je obezbijedio saranju najkreativnijih bibliotečkih centara.

ICIMSS ima za cilj da bude najbolji centar u regionu koji će praktičarima, edukatorima i studentima na postdiplomskim studijama omogućavati kontinuirano stručno usavršavanje u pribavljanju elektronskih podataka i informacija i vođenju bibliotečkih poslova i da provodi istraživanja u oblasti bibliotečkih i informacionih nauka. Planira se i organizacija studija za sticanje doktorata.

Centar postoji kao nezavisna jedinica u okviru Univerziteta Nicholas Copernicus u Torunju u

Poljskoj. Ovim projektom rukovode dva savjetodavna odbora i dvije komisije čiji su članovi istaknuti stručnjaci iz oblasti bibliotečke prakse i bibliotečkog obrazovanja iz više država.

Torunj je srednjevjekovni grad u Poljskoj. Sa svojih 200 hiljada stanovnika izrastao je u pravi kulturni i naučni centar. Tu se održavaju mnogobrojni muzički, pozorišni i filmski festivali. U mjestu gdje je rođen Nicholas Copernicus, 1945. godine je osnovan Univerzitet koji nosi njegovo ime. U Univerzitet je uključeno devet fakulteta sa 31 hiljadom studenata i 2500 zaposlenih.

1945. godine osnovana je i Univerzitetska biblioteka kao dio ovog Univerziteta. Biblioteka trenutno raspolaže sa 900 hiljada monografskih i 4000 serijskih publikacija i specijalnom zbirkom od 600 hiljada jedinica. Fondovi 25 fakultetskih biblioteka sadrže 600 hiljada jedinica.

Biblioteka je posljednjih godina doživjela velike promjene i izrasla je u potpuno integrisani i automatizovani bibliotečki sistem. Zajedno sa tehnološkim, došlo je i do promjena u organizacionoj strukturi biblioteke, uključujući pilot program otvorenog pristupa, a planiraju se i druge promjene (program virtualne elektronske biblioteke, kursevi iz informacijske pismenosti po programu učenja na daljinu, novi sistem isporuke dokumenata itd.).

Škola je primila prve studente u jesen 1977. godine. To su bili bibliotekari, informacijski specijalisti i nastavnici iz bibliotečkih obrazovnih institucija iz ovog regiona. Studenti ne borave u školi nego ostaju da rade kao bibliotekari i edukatori u svojim zemljama. Mišljenja i iskustva razmjenjuju sa drugim studentima i tutorima koristeći se tehnologijom obrazovanja na daljinu. Međutim, početkom svakog od tri semestra organizuju se dvonedjeljni kursevi u toku kojih studenti borave u školi kako bi imali priliku da se lično upoznaju sa svojim kolegama i nastavnicima.

Kako bi svi potencijalni studenti u regionu imali podjednake šanse, u svakoj zemlji će biti imenovani lokalni koordinatori koji će davati sve potrebne informacije o Centru i uslovima potrebnim za upis.

Dodatne informacije o Centru, programu studija, uslovima prijave i upisa mogu se naći na adresi:

<http://www.ICIMSS.uni.torun.pl>

S engleskog prevela i priredila Zdravka Karaica

Nacionalna i univerzitetska biblioteka BiH